



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka (“Službeni glasnik BiH” broj 95/12), člana 25. Pravilnika o godišnjim finansijskim izvještajima političkih stranaka (“Službeni glasnik BiH” broj 96/13), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH”, broj: 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2012. GODINU I POSTIZBORNOG FINANSIJSKOG IZVJEŠTAJA – LOKALNI IZBORI 2012. **SOCIJALDEMOKRATSKE PARTIJE BOSNE I HERCEGOVINE**

Broj: 03-07-6-655/13
Sarajevo, 14. april 2014. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE	5
Predmet revizije.....	5
Cilj revizije.....	5
Obim revizije.....	5
4. PRETHODNE REVIZIJE	5
5. NALAZI I PREPORUKE	6
5.1. NALAZI.....	6
5.2. PREPORUKE.....	10

MIŠLJENJE REVIZORA

Služba za reviziju finansiranja političkih stranaka (u daljem tekstu: Služba za reviziju) je izvršila reviziju finansijskih izvještaja Socijaldemokratske partije Bosne i Hercegovine za 2012. godinu i to: godišnjeg finansijskog izvještaja za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i odredbama člana 15.10 Izbornog zakona BiH, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Smatramo da revizija koju smo izvršili pruža razumnu osnovu za izražavanje našeg mišljenja.

Revizijom smo utvrdili da Socijaldemokratska partija Bosne i Hercegovine u izvještajnom periodu nije postupila u skladu sa odredbama člana 3. stav (1), člana 4. stav (2), člana 8. stav (1) i člana 11. stav (1) i (3) Zakona o finansiranju političkih stranaka, koji je bio na snazi do 04.12.2012. godine, te odredbama člana 8. stav (5) Zakona o finansiranju političkih stranaka, koji je na snazi od 05.12.2012. godine.

Prema našem mišljenju, osim navedenog, revidirani finansijski izvještaj ukazuje da je Socijaldemokratska partija Bosne i Hercegovine u 2012. godini postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Socijaldemokratske partije Bosne i Hercegovine za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Revizija je preduzeta u skladu sa članom 10. stav (1) Zakona o finansiranju političkih stranaka („Službeni glasnik BiH“ broj: 95/12), članom 25. Pravilnika o godišnjim finansijskim izvještajima političkih stranaka (“Službeni glasnik BiH” broj: 96/13) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH” broj: 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

U godišnjem finansijskom izvještaju za 2012. godinu Socijaldemokratska partija Bosne i Hercegovine je iskazala prihod u iznosu od 4.637.289,27 KM¹, što je iskazano u narednoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	496.900,02	10,72 %
2	Prilozi fizičkih lica	146.491,00	3,16 %
3	Prilozi pravnih lica	140.985,00	3,04 %
4	Prihodi od imovine	654.415,00	14,11 %
5	Prihodi od pr.lica	0,00	0,00 %
6	Prihodi od poklona	1.000,01	0,02 %
7	Prihodi iz budžeta	3.175.729,35	68,48 %
8	Ostali prihodi	21.768,89	0,47 %
	Ukupni prihodi:	4.637.289,27	100,00 %

Prema podacima iz godišnjeg finansijskog izvještaja, Socijaldemokratska partija Bosne i Hercegovine je ostvarila rashode u iznosu od 4.965.776,22 KM.

2. PREDSTAVLJANJE POLITIČKE STRANKE

Naziv političke stranke je Socijaldemokratska partija Bosne i Hercegovine. Skraćeni naziv stranke je SDP BiH.

Politička stranka je upisana u registar kod Višeg suda u Sarajevu 21.03.1990. godine, pod brojem upisa: R-I-1/90. Dana 16.03.1999. godine, Socijaldemokratska partija Bosne i Hercegovine je upisana u registar Kantonalnog suda u Sarajevu, pod brojem: R-I-1/99.

Sjedište političke stranke je u Sarajevu, ulica Alipašina 41.

Lica ovlaštena za zastupanje političke stranke su Zlatko Lagumdžija, predsjednik i Nermin Nikšić, generalni sekretar stranke.

Lice ovlašteno za podnošenje finansijskih izvještaja za 2012. godinu je Lidija Korać.

¹ Podaci o prihodima su preuzeti iz korigovanog finansijskog izvještaja za 2012. godinu koji je politička stranka Centralnoj izbornoj komisiji BiH dostavila 09.04.2014. godine, nakon što je u istom otklonila dio nedostataka, koji su bili otklonjivi.

Prema podacima iz godišnjeg finansijskog izvještaja za 2012. godinu, organizacionu strukturu Socijaldemokratske partije Bosne i Hercegovine čine:

- Glavni odbor SDP BiH Sarajevo,
- 10 kantonalnih odbora,
- 3 regionalna odbora,
- 2 gradska odbora,
- 98 općinskih/opštinskih odbora
- Odbor SDP BiH u Brčko distriktu BiH i
- Forum mladih SDP BiH

3. OPIS REVIZIJE

Predmet revizije je godišnji finansijski izvještaj Socijaldemokratske partije Bosne i Hercegovine za 2012. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine i to sljedećih organizacionih dijelova političke stranke:

- Glavnog odbora Socijaldemokratske partije BiH Sarajevo,
- Kantonalnog odbora Socijaldemokratske partije BiH Tuzla,
- Općinskog odbora Socijaldemokratske partije BiH Tuzla i
- Odbora Socijaldemokratske partije BiH Brčko distrikt BiH.

Cilj revizije je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Socijaldemokratska partija BiH u izvještajnom periodu postupala u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i članom 15.10 Izbornog zakona BiH.

Obim revizije finansijskih izvještaja Socijaldemokratska partija BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode od imovine političke stranke i prihode iz budžeta kao i troškove izborne kampanje.

4. PRETHODNE KONTROLE I REVIZIJE

Služba za reviziju finansiranja političkih stranaka je obavila je reviziju i pregled finansijskih izvještaja Socijaldemokratska partija BiH u periodu od 2004. do 2011. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršenog pregleda godišnjeg finansijskog izvještaja za 2011. godinu, Služba za reviziju je izdala Izvještaj o reviziji godišnjeg finansijskog izvještaja Socijaldemokratske partije BiH sa mišljenjem revizora, nalazima revizije i preporukama: da se ne finansira prihodima od imovine koja nije u njenom vlasništvu, da se ne finansira zabranjenim priložima, da uspostavi potpune evidencije o svojim prihodima i rashodima i da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2012. godinu, utvrđeno je da Socijaldemokratska partija BiH nije ispoštovala ranije date preporuke revizije.

5. NALAZI I PREPORUKE

5.1. NALAZI

- a) Socijaldemokratska partija Bosne i Hercegovine je ostvarila prihod od imovine koja nije u njenom vlasništvu, čime je prekršila je odredbe člana 3. stav (1) Zakona o finansiranju političkih stranaka, koji je bio na snazi do 04.12.2012. godine² i odredbe člana 8. stav (5) Zakona o finansiranju političkih stranka, koji je na snazi od 05.12.2012. godine.**

Na osnovu finansijskog izvještaja političke stranke i dokumentacije pribavljene tokom obavljanja revizije, utvrđeno je da je Socijaldemokratska partija Bosne i Hercegovine izdavanjem imovine u Zenici, Varešu i Bosanskom Grahovu, za koju ne posjeduje dokaze o vlasništvu, u periodu od 01. januara do 04. decembra 2012. godine, ostvarila prihod po osnovu zakupnine u iznosu od 31.629,24 KM, čime je prekršila odredbe člana 3. stav (1) tada važećeg Zakona o finansiranju političkih stranka.

Od iste imovine, po osnovu zakupnine u periodu od 05. do 31. decembra 2012. godine Socijaldemokratska partija Bosne i Hercegovine je ostvarila prihod u iznosu od 2.359,68 KM, čime je prekršila odredbe člana 8. stav (5) Zakona o finansiranju političkih stranka ("Službeni glasnik BiH" broj: 95/12)³.

- Socijaldemokratska partija Bosne i Hercegovine je u 2012. godini od izdavanja pod zakup poslovnih prostorija u Zenici, Ulica Masarikova broj 48, koje nisu u njenom vlasništvu, ostvarila prihod u iznosu od 29.712,00 KM⁴ i to: do 04. decembra iznos od 27.715,23 KM suprotno odredbama člana 3. stav (1) tada važećeg Zakona i od 05. decembra iznos od 1.996,77 KM koji u skladu sa odredbom člana 8. stav (5) Zakona o finansiranju političkih stranaka, za političku stranku zabranjen izvor finansiranja.
- Od izdavanja poslovnog prostora u Varešu, Ulica Zvijezda broj 14, za koji ne posjeduje relevantne dokaze o vlasništvu⁵, stranka je ostvarila prihod u iznosu od 3.076,92 KM.⁶ Dio prihoda po osnovu zakupnine u periodu do 04. decembra, u iznosu od 2.834,98 KM je ostvaren suprotno odredbama člana 3. stav (1) tada važećeg Zakona, dok dio prihoda ostvaren od 05. do kraja decembra 2012. godine, u iznosu od 241,94 KM predstavlja

² Prema odredbama člana 3. stav (1) tada važećeg Zakona o finansiranju političkih stranaka, politička stranka može da se finansira iz sljedećih izvora: članarina; priloga pravnih i fizičkih lica; prihoda od imovine u vlasništvu političke stranke; budžeta BiH za finansiranje parlamentarnih grupa u skladu sa članom 10. Zakona, kao i iz entitetskih budžeta i svih njihovih nižih jedinica u skladu sa entitetskim zakonima; dobiti od prihoda preduzeća u vlasništvu političke stranke.

³ U skladu sa odredbom člana 8. stav (5) Zakona o finansiranju političkih stranka, političke stranke ne mogu ostvarivati prihode od imovine koja nije u njihovom vlasništvu.

⁴ Poslovni prostori u Zenici su izdati sljedećim pravnim i fizičkim licima: SUR Resroran "Dubrovnik" Zenica, "Intercons" d.o.o. Zanica i Advokat Dalibor Tikvina.

⁵ Dokumentacija o vlasništvu nad prostorijama, koju je SDP BiH dostavila Centralnoj izbornoj komisiji Bosne i Hercegovine (kopija Katastarskog plana KO Vareš izdata od Općinske geodetske uprave Vareš dana 19.05.2005. godine, je nepotpuna i ne može se sa sigurnošću utvrditi da li na nepokretnostima SDP BiH ima pravo svojine (Mišljenja Sektora za prave poslove i provedbu zakona o sukobu interesa, Odsjeka za pravne poslove, u Centralnoj izbornoj komisiji BiH, broj: Sl. 05-1-78/12 od 04.06.2012. godine).

⁶ Poslovni prostor je iznajmljen pravnom licu PTP "MPM" Vareš.

zabranjeni izvor finansiranja, u skladu sa odredbom člana 8. stav (5) Zakona o finansiranju političkih stranaka.

- Izdavanjem poslovnog prostora u Bosanskom Grahovu, Ulica Maršala Tita broj 13, za koji Socijaldemokratska partija Bosne i Hercegovine također, nema relevantne dokaze o vlasništvu⁷, ostvarila je prihod u iznosu od 1.200,00 KM i to suprotno odredbama člana 3. stav (1) Zakona koji je bio na snazi do 04. decembra iznos od 1.079,03 KM i iznos od 120,97 KM koji je u skladu sa odredbom člana 8. stav (5) Zakona o finansiranju političkih stranaka, zabranjen izvor finansiranja⁸.

Prihode koje je ostvarila po osnovu izdavanja imovine za koju ne posjeduje relevantne dokaze o vlasništvu i imovine koja nije u njenom vlasništvu, Socijaldemokratska partija BiH je u finansijskom izvještaju iskazala u obrascu 3-c kao prihod od imovine u vlasništvu političke stranke.

b) Politička stranka nije ispoštovala odredbe člana 4. stav (2) tada važećeg Zakona o finansiranju političkih stranaka.⁹

Organizacioni dio Socijaldemokratske partije Bosne i Hercegovine u Brčko distriktu BiH je izvršio gotovinske isplate sredstava iz blagajne u iznosu od 3.840,00 KM, a da pri tome nema račune ispostavljene od strane prodavca proizvoda ili izvršioca usluge, niti bilo koje druge isprave o prodatim proizvodima ili pruženim uslugama.

Uvidom u evidencije o isplaćenim sredstvima utvrđena je isplata fizičkom licu u iznosu od 700,00 KM za održavanje web portala, isplate za lijepljenje plakata u iznosu od 130,00 KM, isplate za muzičke izvedbe, recitacije, ozvučenje i postavljanje bina u iznosu od 950,00 KM, isplata za održavanje svečane akademije u iznosu od 400,00 KM, isplata za predizborni materijal u vidu majica sa štampom u iznosu od 1.200,00 KM i isplate fizičkim licima na ime goriva za motorna vozila u iznosu od 200,00 KM.

c) Socijaldemokratska partija Bosne i Hercegovine je postupila suprotno odredbama člana 8. stav (1) Zakona o finansiranju političkih stranaka, koji je bio na snazi do 04.12.2012. godine, jer se finansirala iz zabranjenih izvora.¹⁰

Politička stranka, odnosno njenih deset (10) organizacionih dijelova, je ostvarilo prihod iz izvora koji su zabranjeni političkim strankama, na način što je u periodu januar - novembar 2012. godine koristilo poslovne prostorije u vlasništvu općina, bez plaćanja zakupnine ili uz cijenu zakupa koja je znatno niža od tržišne cijene. Na taj način stranka je prekršila odredbe člana 8. stav (1) Zakona o finansiranju političkih stranaka.

⁷ Dokumentacija o vlasništvu nad prostorijama, koju je SDP BiH dostavila Centralnoj izbornoj komisiji Bosne i Hercegovine (Izvod-prijepis posjedovnog lista Odjela imovinsko-pravnih poslova, Odsjek za katastar i geodetske poslove Općine Bosansko Grahovo od 13.03.2008. godine), je nepotpuna i ne može se sa sigurnošću utvrditi da li na nepokretnostima SDPBiH ima pravo svojine.

⁸ Poslovni prostor je iznajmljen političkoj stranci Demokratski narodni savez, Opštinski odbor Bosansko Grahovo.

⁹ U skladu sa članom 4. stav (2) Zakona o finansiranju političkih stranaka, pravno ili fizičko lice koje političkoj stranci pruža uslugu ili proda proizvod mora stranci da ispostavi račun, bez obzira na to ko snosi plaćanje usluge ili proizvoda, odnosno, bez obzira na to da li je usluga pružena ili proizvod dat bez naplate

¹⁰ U skladu sa odredbom iz člana 8. stav (1) tada važećeg Zakona o finansiranju, državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

- Općinski odbor Socijaldemokratske partije BiH Ilidža je na osnovu Ugovora o zakupu poslovnih prostorija sa Općinom Ilidža, broj: 05-23-6535/2-07 od 07.10.2009. godine, koristio poslovni prostor površine 32 m². Cijena zakupa je ugovorena u procentu 10% od početne cijene zakupa od 20,00 KM za extra zonu, u kojoj se poslovni prostor nalazi, odnosno u iznosu od 2,00 KM po m² uvećanoj za porez na dodatu vrijednost. Korištenjem poslovnog prostora po cijeni zakupnine ispod tržišne cijene, stranka je ostvarila prilog Općine Ilidža u iznosu od 6.336,00 KM.
- Općinski odbor Socijaldemokratske partije BiH Novo Sarajevo bez naknade je koristio prostor površine 102,20 m² u vlasništvu Općine Novo Sarajevo. U skladu sa Odlukom o načinu i visini plaćanja zakupnine poslovnih prostora (prečišćeni tekst - "Službene novine Kantona Sarajevo", broj 29/07) najniža cijena mjesečne zakupnine u prvoj zoni Općine Novo Sarajevo iznosi 12,00 KM po m². Korištenjem poslovnog prostora bez naknade, stranka je ostvarila zabranjen prilog u iznosu od 13.490,40 KM.
- Općinski odbor Socijaldemokratske partije BiH Ilijaš bez naknade je koristio prostor površine 33,80 m² u vlasništvu Općine Ilijaš. Obzirom da u skladu sa Odlukom o načinu i visini plaćanja zakupnine poslovnih prostora na području Općine Ilijaš ("Službene novine Kantona Sarajevo", broj 2/00) najniži iznos mjesečne zakupnine na području ove općine iznosi 8,00 KM po m², stranka je ostvarila zabranjen prilog u iznosu od 2.974,40 KM.
- Općinski odbor Socijaldemokratske partije BiH Donji Vakuf bez naknade je koristio prostorije, površine 32,5 m², u vlasništvu Općine Donji Vakuf. U skladu sa Odlukom o kriterijima i mjerilima dodjele u zakup poslovnih prostorija Općine Donji Vakuf („Službeni glasnik Općine Donji Vakuf“, broj 2/3) cijena zakupa poslovnog prostora u prvoj zoni iznosi 10,00 KM po m². Neplaćanjem zakupnine za vrijeme korištenja poslovnog prostora u periodu od 11 mjeseci Socijaldemokratska partija BiH je ostvarila nenovčanu donaciju Općine Donji Vakuf u iznosu od 3.575,00 KM.
- Općinski odbor Socijaldemokratske partije BiH Sanski Most bez naknade je koristio prostor površine 28,00 m² u vlasništvu Općine Sanski Most. Obzirom da u skladu sa Odlukom o uslovima i načinu davanja u zakup poslovnih prostorija i poslovnih zgrada na području općine Sanski Most ("Službeni glasnik Općine Sanski Most", broj 04/12) cijena zakupa po m² iznosi 10,00 KM za poslovne prostore do 25,00 m², stranka je ostvarila zabranjeni prilog u iznosu od 3.080,00 KM.
- Općinski odbor Socijaldemokratske partije BiH Ključ bez naknade je koristio poslovni prostor, u vlasništvu Općine Ključ, površine 25 m². Ugovor o zakupu je zaključen između političke stranke i Udruženja građana "Ključki biseri" iz Ključa, kao ovlaštenog upravitelja zgrade Doma kulture II diletacije, u kojoj se nalaze poslovne prostorije, koje koristi Socijaldemokratska partija BiH. U skladu sa odlukom Općinskog vijeća Općine Ključ cijena zakupnine u prvoj zoni ove Općine u 2012. godini je iznosila 6,00 KM po m², kako navodi Općina Ključ u svom aktu broj: 05-02-1062/13 od 29.04.2013. godine. Korištenjem poslovnog prostora bez naknade u period od 11 mjeseci, politička stranka je ostvarila zabranjen prilog Općine Ključ u iznosu od 1.650,00 KM.
- Općinski odbor Socijaldemokratske partije BiH Jablanica bez naknade je koristio poslovni prostor površine 21 m², u vlasništvu Općine Jablanica. Obzirom da u skladu sa Odlukom o prodaji i davanju u zakup poslovnih prostorija Općine Jablanica, broj: 02-02-1262-1/06-XVIII od 24.05.2006. godine najniža cijena zakupnine u I zoni iznosi 8,00 KM po m², politička stranka je ostvarila zabranjen prilog u iznosu od 1.848,00 KM.

- Prema podacima koje je na zahtjev Centralne izborne komisije BiH dostavio Grad Mostar, Općinski odbor Socijaldemokratske partije BiH u Mostaru je tokom 2012. godine, koristio poslovne prostorije površine 30 m² u vlasništvu Grada Mostara, bez plaćaja zakupnine. Na osnovu Odluke o načinu i postupku davanja u zakup poslovnih prostora Grada Mostara, broj: 01-02-5/11 od 08.02.2011. godine, cijena zakupa poslovnih prostora na području Grada Mostara, za drugu kategoriju, iznosi 8,00 KM po m². U skladu sa navedenom Odlukom, Socijaldemokratska partija BiH je korištenjem poslovnog prostora bez naknade u periodu od 11 mjeseci ostvarila zabranjen prilog u oznosu od 2.640,00 KM.
- Organizacioni dijelovi Socijaldemokratske partije BiH u Bosanskoj Krupi i Derventi su koristili općinske/opštinske prostore bez plaćanja zakupnine.

d) Politička stranka je prekršila odredbe člana 11. stav (1) i (3) Zakona o finansiranju političkih stranaka koji je bio na snazi do 04.12.2012. godine¹¹.

Organizacioni dijelovi Socijaldemokratske partije Bosne i Hercegovine, OO SDP Brčko distrikt BiH, KO SDP BiH Tuzla i OO SDP Tuzla, koji su bili predmetom revizije, u poslovnim knjigama nisu uspostavili potpune evidencije o troškovima, dio troškova su evidentirali na osnovu nevalidne dokumentacije i u finansijskom izvještaju nisu iskazali troškove u skladu sa Pravilnikom o godišnjim finansijskim izvještajima političkih stranaka.

- (1) Uvidom u finansijsku dokumentaciju tri pomenuta organizaciona dijela Socijaldemokratske partije Bosne i Hercegovine, utvrđeno je da na isplate u iznosu od 2.311,23 KM, koje imaju karakter ličnih primanja i oporeziva su u skladu sa poreznim propisima, nisu obračunati i plaćeni, a također u poslovnim knjigama i finansijskom izvještaju nisu iskazani troškovi po osnovu poreza i doprinosa.¹²
- Organizacioni dio SDP BiH u Brčko distriktu BiH je isplatio sredstva u iznosu od 1.400,00 KM, navodeći kao trošak, pomoć mjesnom odboru. Uvidom u dokumentaciju o isplati pomenutog iznosa sredstava, utvrđene su isplate fizičkim licima u iznosima po 50,00 KM. Također, pomenuti organizacioni dio stranke je svom predsjedniku platio troškove telefona u iznosu od 326,10 KM.
 - Kantonalni odbor SDP BiH Tuzla je iznos od 385,09 KM i Općinski odbor SDP BiH Tuzla iznos od 200,04 KM isplatio na ime goriva fizičkim licima koja nisu uposlenici političke stranke.

Obzirom da su sredstva u iznosu od 1.726,10 KM isplaćena fizičkim licima, koja nisu uposlenici političke stranke, ista imaju karakter ličnih primanja, na koja je politička stranka trebala obračunati i uplatiti porez na dohodak i pripadajuće doprinose u skladu sa poreznim propisima.

- (2) U poslovnim knjigama i finansijskom izvještaju nije iskazan dio troškova za električnu energiju. Kantonalni odbor SDP BiH Tuzla nije iskazao troškove za novembar i decembar 2012. godine, a Općinski odbor SDP BiH Tuzla nije iskazao troškove za decembar, što ukazuje na činjenicu da ovi organizacioni dijelovi stranke troškove evidentiraju u momentu

¹¹U skladu sa odredbama 11. stav (1) tada važećeg Zakona o finansiranju, stranka je obavezna uspostaviti potpune i tačne evidencije o svojim prihodima i rashodima.

U skladu sa odredbama člana 11. stav (3) istog Zakona o finansiranju, stranka je obavezna podnositi finansijski izvještaj u formi koju odobri Centralna izborna komisija Bosne i Hercegovine. Sadržaj, forma, način i drugi detalji izvještavanja uređeni su tada važećim Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06)

¹² Zakon o porezu na dohodak ("Službene novine Federacije BiH", br. 10/08, 9/10 i 44/11) i Pravilnik o primjeni Zakona o porezu na dohodak ("Službene novine Federacije BiH", broj: 67/08, 4/10, 86/10, 10/11, 53/11 i 20/12)

njihovog plaćanja, a ne u momentu kada je trošak nastao, odnosno kada je pružena usluga ili kupljen proizvod.

- (3) Dio troškova politička stranka je iskazala na osnovu nevalidne dokumentacije. Organizacioni dio stranke u Brčko distriktu BiH je na osnovu specifikacije troškova evidentirao nabavku prehrambenih proizvoda u iznosu od 388,00 KM, bez važećih računa ili drugog dokumenta ispostavljenog od strane isporučioaca proizvoda. Općinski odbor SDP BiH Tuzla je isplate za ugostiteljske usluge u iznosu od 1.956,04 KM izvršio pravnom licu Sidney International, na osnovu nevalidnih „nota“ računa i bez fiskalnih računa, koji su obavezni i zakonom propisani.

Troškovi izborne kampanje

Socijaldemokratske partije Bosne i Hercegovine je iskazala troškove izborne kampanje u skladu sa odredbama člana 15.10 Izbornog zakona Bosne i Hercegovine, odnosno u okviru zakonom utvrđenog limita.

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM¹³ po biraču u svakom izbornom krugu, prema broju birača koje je objavila Centralna izborna komisija BiH.

U svrhu izborne kampanje Socijaldemokratska partija Bosne i Hercegovine je iskazala troškove u iznosu od 1.103.136,25 KM, iako je prema podacima Centralne izborne komisije BiH, na osnovu broja birača, mogla potrošiti 1.358.399,70 KM.

5.2. PREPORUKE

Preporučuje se Socijaldemokratskoj partiji Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da se ne finansira iz izvora koji su političkim strankama zabranjeni Zakonom o finansiranju političkih stranaka,*
- *da niži organizacioni dijelovi političke stranke, u skladu sa odredbama Zakona o finansiranju političkih stranaka, uspostave potpune evidencije o rashodima,*
- *da finansijske izvještaje podnosi Centralnoj izornoj komisiji Bosne i Hercegovine u formi propisanoj Pravilnikom o godišnjim finansijskim izvještajima političkih stranaka,*
- *da poštuje i porezne propise, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju i*
- *da niži organizacioni dijelovi političke stranke uspostave kontrolu nad ispravnošću dokumentacije, na osnovu koje evidentiraju troškove i isplate sredstava.*

¹³ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

Komentar

Socijaldemokratska partija Bosne i Hercegovine je po Preliminarnom izvještaju o reviziji godišnjeg finansijskog izvještaja za 2012. godinu, koji joj je dostavljen 26. marta 2014. godine djelimično otklonila nedostatke u godišnjem finansijskom izvještaju, o čemu je dostavila relevantne dokaze.

Služba za reviziju je uvažila otklonjene nedostatke i u tom dijelu korigovala nalaze revizije, navedene u preliminarnom revizijskom izvještaju.

Revizor

Veliborka Kenjić

Šef Službe za reviziju

Mr.sc. Hasida Gušić, revizor